

Dia Internacional di Lenga Materno

ORANJESTAD - Dia 21 di februari di tur aña ta Dia Internacional di Lenga Materno. Segun proclamacion di UNESCO. Como Departamento di Cultura Aruba (DCA) nos tin e proyecto di Arte di Palabra (ADP) cu ta un competencia conta cuenta y di storia cortico, poesia pa hoben escolar.

ADP Interinsular ta un competencia entre Corsou, Boneiro y Aruba. Esaki ta un competencia pa alumnonan di scolnan avansa cu DCA ta organisa for di 2009 y cu aña pa aña e interes bou di nos hobennan ta creciendo pa participa. Meta di e proyecto aki ta pa duna hoben oportunidad pa demonstra nan creatividad literario; pa promove lesamento y skirbimento den nos idi-

oma Papiamento; pa stimula publicacion di arte literario den Papiamento. Y tambe pa e hobennan di A.B.C. tin un intercambio den nan cultura. Cu e proyecto aki DCA ta traha hunto cu Grupo di Corectornan di Papiamento y Fundacion Lanta Papiamento. Pa medio di e competencia aki di Arte di Palabra ta stimula e hobennan pa medio di nan poesia of cuenta cortico haci bon uzo di nos idioma Papiamento y enrikece nan conocimiento di nos idioma. Ora di saca informacionnan cultural di tur loke ta publicacion. DCA ta haci su esfuerzo pa percura pa tur ta den bon idioma Papiamento. Publicacionnan manera Nos Isla, foyetonan di nos Simbolonan Nacional, manera nos escudo, himno y bandera, Celebra-

cion di San Juan, Dera Gay, Proyecto di Expedicion Rescate y esun di e aña aki cu lo presenta Expedicion Rescate Naturalesa (ERN). ERN ta trece informacionnan valioso di nos flora y fauna. Tur esaki den un exposicion interesante na Parke Nacional Arikok pa publico en general y nos muchanan di scol. Y otro publicacionnan.

Ora di duna relato den forma oficial nos di DCA ta aplica e Vocabulario Ortografico di Papiamento di 2009.

Den sentido general ta considera idioma, como e medio unificado di mas importante di un cultura. Idioma ta carga tur pensamiento y experiencia humano, cultura y identidad. Idioma ta transferi cultura.

Mirando esaki DCA tin idioma Papiamento como un punto importante

den su educacion cultural. Como cu ortografia tambe ta un simbolo sumamente importante, como muestra di un propio identidad. Mester muestra cu e oficialisacion por crea aprecio y stimula nos pa, cu orguyo y amor, siña nos hendenan conoce e historia di nos idioma materno bon y promove e uzo corecto di papia y skirbi (papia- y skirbimento).

Durante e desaroyo di nos idioma materno Papiamento y como Departamento di Cultura Aruba bou auspicio di Ministerio di Cultura ta keda enfoca pa su retonan pa educa, promove, cuida y haci'e mas conoci e bon uzo di nos Papiamento pa generacionnan cu ta bini.

Pabien Arubianonan riba Dia Internacional di Lenga Materno. □